

La Verda cun Anita Mazzetta sco locomotiva

La Verda ha nominà sias candidatas e ses candidats per las elecziuns dal cussegl naziunal da quest atun

■ **(mc) Anita Mazzetta (Cuira), Gian Linard Nicolay (Ardez), Seraina Schwab (Degen), Martin Tucek (Peist) e Gianna Catrina (Haldenstein) èn ils candidats da la partida La Verda dal Grischun per las elecziuns dal cussegl naziunal.** Ad ina conferenza da medias ch'ha gi lieu ier a Cuira n'ha la Partida verda dal Grischun dentant betg mo preschentà sias candidatas e ses candidats, mabain era ses program. En il center da sias activitads stattan la protecziun dal clima, l'energia schubra e l'egualità.

Reacquistar in segund sez per il spectrum sanester verd

Ditg èsi stà russaivel enturn La Verda dal Grischun. En il cussegl grond, il parlament grischun n'èn ils verds dal Grischun betg represchentads ed a las elecziuns dal cussegl naziunal ha La Verda tschentà l'ultima gada l'onn 2011 ina glista per il cussegl naziunal. Las chaumas da scolars en connex cun il clima hajan dà a La Verda in ulteriur stimpel da s'engaschar e da sa participar a las elecziuns, ha declarà *Anita Mazzetta* ier a Cuira. Per insumma avair ina schanza tar las elecziuns naziunalas en il Grischun vul La Verda sa colliar cun glistas da partidas parentadas. En discussiun saja en quest connex ina colliaziun cun ils socialdemocrats e/u cun ils verd-liberals. Anc uss na saja dentant nagut concret. La finamira saja da reconquistar in segund sez per il spectrum sa-

nester-verd. Sch'i na tanschia betg per in agen sez vul La Verda almain far attent ch'els existian er anc e demonstrar ch'els veglian profitar dal schlantsch che temas ecologicis hajan actualmein, di *Nicolaus Zogg*, il nov parsura dals verds.

Cun trais dunnas e dus umens

Quest onn sa preschentà La Verda cun trais dunnas e dus umens en il cumbat electoral. Sco locomotiva figurescha Anita Mazzetta sisum la glista. Sco presidenta dal cussegl communal è ella stada 2018

la pli auta vischina da Cuira. Dapi 10 onns fa ella part da la legislativa communal da Cuira e dapi prest 20 onns è ella engaschada sco mainagestiu dal WWF Grischun. Tenor La Verda na dettia actualmain en il Grischun ina persuna che

disponia ord atgna experientscha d'enconuschientschas da l'ecologia en las vallas grischunas sco Mazzetta. Passa 20 projects da las spartas ambient, turissem ed implants idraulics sco era la sanaziun ditg ignorada da l'aua restanta porta sia sutscriziun incorruptiva.

Cun ses 18 onns vegn la conoragnatura da la chauma da clima a Cuira *Gianna Catrina* da Haldenstein ad esser ina da las pli giuvnas candidatas per il cussegl naziunal ch'i ha dà ina giada en il Grischun. Plinavant candideschin sin la glista dals verds l'economista agrara e managera da l'Institut da perscrutaziun per la cultivaziun biologica *Gina Linard Nicolay* d'Ardez, l'inschignera d'ambient e pura da bio *Seraina Schwab* da Degen ed il scolast ed accompagnader da fugitivs *Martin Tucek* da Peist.

«Vista integrala sin l'entir»

Il slogan da reclama sa cloma «Vista integrala sin l'entir» e cumpiglia las domenas: nutriment, clima, energia, auva, diversità biologica, giustia sociala e turissem. La Verda vul promover la produziun ed il consum regiunal, abitar e viagià senza fossils, promover il mixt d'energia solar ed auva e mantegnair saunas e vitalas nossas auvas ch'èn indispensablas per la veta. Plinavant propagescha La Verda «egualità e participaziun» ed ella vul s'engaschar per «dapli qualità e singularità stagl quantità ed uniformità».



Candidats da La Verda: Gian L. Nicolay, Seraina Schwab, Anita Mazzetta, Gianna Catrina e Martino Tucek (da san.).

FOTO O. ITEM